



## بسم الله الرحمان الرحيم بيان السيد رئيس الحكومة

تعيش بلادنا كيما بقية بلدان العالم على وقع تطور وباء Corona وهي  
وضعية استثنائية بكل المقاييس معرفهاش العالم ولا تونس قبل ومازلنا منعرفوش  
تبعاتها وشنو باش تغير في الإنسانية كلها.

تلزينا بش ناخذوا فيها قرارات صعبة وثقيلة واستثنائية طيلة الجمعيتين إلي  
فاتت. وهذاك علاش يلزم برشا صبر لأنو القرارات إلي ناخذو فيها عمرها ما  
اتأخذت في تونس ولا في العالم.

أوروبا تقارن في الوضع مع الحرب العالمية الثانية. وحا حتى في الثورة  
ما عشناش هالوضعية الاستثنائية إلي عايشينا اليوم.

نعرف إلي التوانسة متقلقين وعندهم الكثير من التساؤلات وأنا واعي إلي  
يلزما نفسرو أكثر مقاربتنا وخياراتنا وقراراتنا.

كان هدفنا منذ بداية الأزمة يعني منذ انطلاق الحكومة حماية التوانسة ومنع  
انتشار الفيروس والسيطرة على الوباء وخلينا صحة التوانسة أولوية مطلقة.

المقاربة التي اعتمدها أثبتت إلى حدّ الآن نجاعتها:  
خذينا الثقة في أنفسنا وعلنا على رواحنا على خاطر كل الدول الصديقة والشقيقة  
لاهية في روحها.

- اعتمدنا على آراء الخبراء والعلماء واستفدنا من تجارب الدول إلي سبقتنا

في مواجهة هذا الوباء، وقرينا بالقداء ووين نجحوا ووين أخفقوا.

- وسعنا الاستشارات لكل المتدخلين وشركنا المنظمات والأحزاب

والشخصيات.

- اعتمدنا على مقارنة شاملة فيها البعد الصحي والاجتماعي والاقتصادي

والأمني

- عبئنا كل الطاقات المادية والبشرية للدولة وحاولنا أنو كل مؤسساتها تخدم

بانسجام قدر الإمكان.

أهم ما في هذه المقاربة أننا كنا دائما نستبق المراحل باش نتفاداو الدخول في

مراحل متقدمة من انتشار العدوى وهاذاك علاش:

1- سكرنا حدودنا البرية والبحرية على المسافرين في ظرف أسبوع وما خلينا

كان رحلات الإجلاء.

2- وقفنا القراية على بكري ووقفنا كل الأنشطة الثقافية والرياضية وقلصنا من

أوقات فتح المقاهي وقلصنا في كل إمكانيات التجمعات في ظرف أسبوع زادة.

3- ومن بعد تعدينا في الأسبوع الثاني للتقليص من أوقات العمل وأطلقنا نظام

الحصة الواحدة وصولا إلى القرار الرئاسي لمنع الجولان نهار الثلاث إلي

فات.

4- واليوم ومن بعد أقل من 15 يوم وصلنا إلى قرار الحجر الصحي الشامل وعدد

الحالات في بلادنا مازال ما تجاوزش 60 حالة.

إلى جانب الاستباق وإلي مكننا من السيطرة على توسع العدوى، قمنا وبصفة

دورية وفي فترات متقاربة بتقييم جدوى الإجراءات والتحضير المسبق للإجراءات

إلي بش نزيدوا ناخذوها، وهذا مكننا من تحضير الراي العام باش يتقبل التضييقات

والتقييدات إلي أمرنا بيها لفائدة المصلحة العامة ولحماية بلادنا وصحة مواطنينا.

والكل من غير ما ما ندخلو في حالة هلع وإلا هيسثيريا وإلا فوضى.

قرار الحجر الصحي الشامل إلي خذيناها البارح في مجلس الأمن القومي وأعلن

عليه رئيس الجمهورية، الإيجابي فيه، أنه يدفع لبقاء أغلب الناس في ديارها وينقص

من تواصلهم الاجتماعي، وكذلك الإيجابي فيه زادة أنو بش يمكننا من إجراء على

غاية الأهمية وهو القيام بعدد كبير يناهز 10.000 تحليل لتشكيل عينة تورينا

الاتجاهات المحتملة ومدى انتشار المرض وهكّا نجمو نحضروا رواحنا لكل السناريوهات وديما بصفة استباقية.

القرارات الاستثنائية إلي خذيناها ضرورية لسلامتنا وسلامة بلادنا، وهي صحيح ثقيلة وتتطلب أن نفسروها ونفهموها للمواطنين وهذا إلي باش نسعاو باش نعملوه.

الحجر الصحي الشامل قرار صعب حتمتو علينا الوضعية الجدية إلي عايشيناها ولأني جدية وجدية للغاية يلزمها برشة حكمة ومسؤولية وانضباط.

الحجر الصحي الشامل إجراء وقائي يتطلب أنو الناس لكل تقعد في ديارها وما يخرج حدّ إلا للضرورة، بالطبيعة مع بعض الاستثناءات.

الأصل في الحجر الصحي هو البقاء باستمرار في البيوت والاستثناء هو الخروج لقضاء أشياء ضرورية وحيوية ولقترات محدودة يعني:

- يمكن الواحد يخرج يمشي يقضي قضية الدار الضرورية من غذاء وخبز ومواد تنظيف وبعض المستلزمات الأخرى.
- يمكن الذهاب لصيدلية باش يشري دواء أو للمستشفى للعلاج.

الحجر الصحيّ يلزموا يشمل الناس الكل إلا إلي خدمتهم ضرورية لتسيير المرفق العام وللأنشطة الحيوية الأساسية كيما: الأمن، والصحة، والنقل، ومنظومة الغذاء، والكهرباء، والماء، والبنوك، والصناعات الحيوية وغيرها.

كل القطاعات هاذي باش يتوفر لها النقل اللازم.

في المجلد بش بيقا قرابة 15% من السكان، أي حوالي مليون ونص تونسي يخدموا بش ما توقفش البلاد وباش يحميو العشرة ملايين إلي باش يقعدوا في ديارهم.

نعرف إلي عندكم برشا تساؤلات حول الوضعية الجديدة وبعض الأشياء مازالت غامضة عندكم.

إلي نأكد هولكم هو أن كل الدوائر الحكومية متجندة بش تقدم اليوم وغدوة التوضيحات المطلوبة وتجاوب على كل الأسئلة المشروعة وبدأت بعض الوزارات في نشر التفاصيل إلي تهماها على مواقعها الرسمية.

وبالنسبة للقطاع الخاص التنسيق قائم بين كل الفاعلين تحت إشراف الحكومة وبالتعاون مع المنظمات لتحديد المشمولين بمواصلة العمل وإبلاغهم وإبلاغ الرأي العام بالأنشطة المهنية إلي باش تتواصل مع تحديد النسق متاعها. ونعولوا برشا على وسائل الإعلام بش تساعدنا على إبلاغ التفسيرات المطلوبة.

الوضعية إلي وصلناها بش يكون عندها كلفة كبيرة على منظومة الصحة متاعنا إلي هي أصلا كانت تعاني من شح الموارد واهتراء البنية التحتية وبش يكون عندها أيضا كلفة على الأشخاص وخاصة الفئات الضعيفة وعلى نسيجنا الاقتصادي بكل أصنافه: مهن حرة وصناعية وتجار وشركات صغرى ومتوسطة وكبيرة وبعض القطاعات باش تتضرر أكثر من غيرها. في هذا المجال ومنذ أسبوع وأحنا نقيم وندقق في كل الإجراءات إلي يلزم ناخذوها باش نحققوا 3 أهداف:

1- الهدف الأول: أنو ما يقعد حتى تونسي محتاج وإلا من غير سند في هذا الظرف.

2- الهدف الثاني: أنو ما نفقدوا حتى موطن شغل.

3- الهدف الثالث: أنو ما نفقد حتى مؤسسة اقتصادية بل نجهزوها باش حال ما نخرجوا من هذه الأزمة ترجع لإنتاجها العادي.

ولتحقيق هذه الأهداف في حماية الأفراد ومواطني الشغل والمؤسسات قررنا الإجراءات الاستثنائية التالية وإلي كلفتها باش تناهز 2500 مليون دينار.

أولا: للمحافظة على مواطني الشغل وضمان تواصل الدخل للعمال والأجراء والموظفين وتخفيف العبئ المالي عليهم قررنا:

1- فتح خط تمويل بقيمة 300 م د كمساعدات لفائدة العمّال المحالين على البطالة الفنية.

2- تخصيص اعتمادات مالية استثنائية بقيمة 150 م د لفائدة الفئات الهشة ومحدودي الدخل والفئات ذات الاحتياجات الخاصة باش تتعطى في شكل منح.

وزارة الشؤون الاجتماعية باش تصدر التوضيحات اللازمة في هذا المجال.

3- تأجيل خلاص أقساط القروض البنكية لمدة 06 أشهر بالنسبة للإجراء إلي لا يتجاوز دخلهم الشهري ألف دينار.

ثانيا: وبالنسبة للمؤسسات الاقتصادية وخاصة المؤسسات الصغرى والمتوسطة والنشطين الاقتصاديين للحساب الخاص من أشخاص طبيعيين وأصحاب مهنة حرة وإلي نعرفو انهم متضررين من تباطؤ نشاطهم وجزء منهم باش يتوقفوا. وحتى نخفف عليهم العبئ المالي وتوفر لهم السيولة اللازمة قررنا:

1- تأجيل دفع الأديان لمدة 3 أشهر ابتداء من غرة أفريل.

2- تأجيل دفع المساهمة في الضمان الاجتماعي للثلاثية الثانية لمدة 3 أشهر.

3- تأجيل خلاص أقساط الديون البنكية والمؤسسات المالية لمدة 6 أشهر.

4- جدولة الديون الجبائية والديوانية لمدة 7 سنوات.

5- وضع خط ضمان بقيمة 500 م د لتمكين المؤسسات من قروض جديدة للتصرف والأشغال.

6- التمكين من استرجاع فائض الأديان على القيمة المضافة في أجل أقصاه شهر.

من جانب آخر باش نحافظو على مؤسساتنا ونهيئوها للعودة لنشاطها قررنا:

1- إحداث صناديق استثمارية بمبلغ جملي قدره 700 م د لهيكل ورسملة المؤسسات المتضررة.

2- السماح للشركات المصدرة كليا بترفيح نسبة التسويق في السوق المحلية

من 30% إلى 50%.

3- تمكين الشركات من إعادة تقييم العقارات المبنية وغير المبنية المضمنة بموازنتها حسب قيمتها الحقيقية.

4- إقرار عفو جبائي وديواني لفائدة المطالبين بالأداءات المتخلدة بذمتهم.

5- إعفاء المؤسسات التي أبرمت صفقات عمومية وتعطل إنجازها نتيجة أزمة الكورونا من خطايا التأخير لمدة أقصاها 6 أشهر.

ثالثا: وحتى ندعم المخزون الاستراتيجي متاعنا قررنا:

توفير اعتمادات إضافية بقيمة 500 م د لدعم المخزون الاستراتيجي من الأدوية والمواد الغذائية والمحروقات.

رابعا وأخيرا: وحتى يرتاح المواطنون نحن بصدد دراسة التعديلات القانونية لتعليق وقتي للنتبغات في الجرائم المالية كما سنعمل على إيقاف كل القرارات إلي تخص قضان الماء والضو والتاليفون لمدة شهرين.

البلاد اليوم كلّها معببة وموحدة في معركة خطيرة بش ننتصرو فيها بعون الله وبفضل الجهودات الجبارة إلي يبذلو فيها كل المتدخلين وعلى راسهم قطاع الصحّة.

وفي المعركة لا مجال للعبث ولا مجال للاستهتار وباش يكون ردّنا قاسي وقوي على كل المحتكرين والمتلاعبين بقوت التوانسة وبصحتهم وبحياتهم وإلي ترتقي جرائمهم إلى جرائم حرب.

الناس الكل يلزم تفهم إلي الدولة قوية ومتسمحش بخرق القوانين لأي كان وخاصة في هذه الظروف الاستثنائية.

المعركة هادي عندها كلفة والقرارات الاستثنائية إلي خذيناها عندها كلفة وما عندناش خيار من أجل الاستمرار والصمود والمحافظة على نسيجنا الاقتصادي. وفي المعركة هادي زادة يلزم تقاسم الأعباء بمنحى تضامني طوعي وخاصة من المؤسسات إلي عندها إمكانيات كبيرة.

وإن شاء الله ماتضطرّش الدولة باش تاخذ إجراءات متشددة، من جانب واحد في هذا الصدد.

المعركة هذي على خطورتها وقسوتها وحدتنا وقربتنا من بعضنا وخلاتنا نخطو اليد في اليد بش نحميو أنفسنا ونحميو بلادنا.

كيف نشوف الجمعيات المتجندة والشباب إلي في الحوم قاعد يتنظم باش يمد يد المساعدة نزيد نتأكد أنو باش نخرجو من هالأزمة بوحدة وطنية أقوى.

المعركة هذه تتطلب أيضا درجة عالية من الانضباط للتعليمات الصحية وقدر كبير من المسؤولية بالنسبة لكافة المواطنين.

باش نجموا نقودوا العملية بكل نجاعة بش نطلبو من المجلس التشريعي تمكين الحكومة بإصدار مراسيم لاتخاذ التدابير المستعجلة حسب مقتضيات الفصل 7 من الدستور.

الدولة مسؤولة وتعمل بكل طاقاتها لتوفير الحماية والأمن ولضمان التزود والإبقاء على الأنشطة الأساسية وتتبع شخصا في السميد والعجين وعطيت تعليمات لتوفير كميات إضافية وتأمين المطاحن ومسالك توزيع من طرف الأمن وبمساندة الجيش وما تخافوش كل شيء باش يكون متوفر وهذه مسؤوليتنا.

ولمزيد التنسيق بين الوزارات وبين السلط الجهوية والمركزية ومتابعة حسن تنفيذ كل إجراءات الحجر الصحي الشامل فعلنا هذا الأسبوع اللجنة الوطنية لمجابهة الكوارث وإلي باش تكون مسؤولة على احترام الإجراءات بما فيها الحجر الضروري وأخذ كل التدابير بما فيها التسخير.

الدولة مسؤولة ومتحملة مسؤوليتها والعائلة زادة مسؤولة على أبنائها وعلى كبار السن، وكل مواطن مسؤول ويتحمل قدر من المسؤولية لحماية نفسه ولحماية المجموعة ولحماية بلادو.

نعرف إلى صعب تغيير السلوك بين صباح وليلة ولكن أمام خطورة الوضع و حياة الناس في الميزان فإن الاستخفاف بقواعد الوقاية بمثابة جريمة متعمدة وهذا موش مقبول.

نحب نجدد شكري وامتناني لكافة المتدخلين في الخطوط الأمامية سواء في قطاع الصحة أو الأمن أو الجيش وكافة الهياكل العمومية المساهمة في الجهد الوطني.

نحن في معركة نخط فيها معاني نبيلة ونحقق فيها نجاحات وبطولات. تواجه بلادنا هذه الأزمة بإمكانيات، صحيح متواضعة، أما بمعنويات عالية أما بمقاربة ناجعة.

المعركة مازالت متواصلة ولكن بفضل المجهودات الجبارة والحكمة إلى قاعدة تتحلى بها كافة الأطراف وبفضل الإيمان العميق بقدرة بلادنا على الصمود والنجاح سننتصر في النهاية وسنعبر نحو برّ الأمان.

أحنا عملنا الحجر الصحي الشامل موش باش تاوقف الحياة أما باش ترجع الحياة.

نتحمل شوية التضيق والتقييد، ننضبط للتعليمات الصحية، نتضامن ونبرهن على تآزرنا، نضحّي شوية لأن النجاحات الكبرى تتبنى بالتضحيات وستتوقف بفضل الله إلى تجاوز هالوضع والخروج بسلام إلى غد أفضل. ربي يوفقنا لما فيه خير بلادنا وشعبنا.

والسلام عليكم ورحمة الله وبركاته



